

養  
吉  
齋  
餘  
錄

養吉齋餘錄卷之五

賜進士出身雲貴總督翰林院編修

臣吳振棫纂

奸民劉松以河南鹿邑縣混元教案成旨肅隆德縣其黨宋之清劉之協復假名白蓮教乾隆五十八年謀亂事發就執純廟命治其首惡餘悉量減劉之協之黨復於楚豫秦蜀間往來煽誘六十年勢漸猖獗嘉慶元年諸郡縣羣賊響應遂成燎原將帥紛紜僂指不足以盡民間既戾於賊復擾於兵奔竄流離千村荆棘余幼時入蜀所目覩也九年八月賊始盡平計其始終十歷寒暑當時賊中有黃號青號白號藍號線號又有掌櫃元帥先鋒總兵等名目焚掠之慘蔓於數省頃相去數十年偶檢敝篋得曩所錄軍中章疏文檄摘書諸賊首姓名於後涓涓不息遂成江河後之人宜惕然於弭患之不可不豫也

額勒登保督辦一路爲張長更蕭占國冷添祿劉允恭龐洪  
勝楊開甲陳傑伍金柱朱國富王廷詔王凌高張什伍懷志  
冉添泗王士虎高三馬五辛斗高見奇辛聰苟文明熊方青  
陳文海姚興祖宋應伏景英齊國典靳思慶德楞泰督辦一  
路爲龔文玉龔其位高均德符曰明冉添元陳得俸齊國謨  
高二徐添德龍紹周樊人傑蒲添寶陳侍學趙鑑戴世傑熊  
翠曾芝秀劉渣鬍子冉璠張世虎李顯碧趙聰觀勒保督辦  
一路爲曾柳伍一凱林定相洪道人王三槐郭長俊包正洪  
卜三聘龔建汪瀛楊開第徐萬富張士龍鮮俸先苟文通徐  
添壽王登科冉學勝蕭坤張添倫魏學盛陳國珠李彬辛文  
徐添培度向瑤楊步青劉朝選伍金元賴飛隴湯思蛟張簡  
張長青唐明萬苟文富王國賢王青宋國品明亮督辦一路

爲楚金貴魯維志張漢潮李潮李槐詹世爵惠齡督辦一路  
爲聶人傑張正謨劉宏鐸覃正潮劉起榮恆瑞督辦一路爲  
曾士興孫士毅督辦一路爲楊子放畢沅督辦一路爲熊道  
成陳德本總兵孫清元承辦一路爲張泳壽額勒登保福甯  
會辦一路爲林之華覃加耀德楞泰額勒登保福甯會辦一  
路爲羅其清羅其書冉文傳額勒登保勒保會辦一路爲熊  
老八德楞泰明亮會辦一路爲孫賜俸姚之富齊王氏德楞  
泰勒保會辦一路爲趙麻花王珊宜綿泰承恩會辦一路爲  
馮得仕翁祿玉林開泰王可秀成自智胡智和廖明萬李九  
萬觀成福甯會辦一路爲譚貴觀成劉君輔會辦一路爲陳  
崇德川北道李鉉太平營都司謝開元會辦一路爲徐添富  
又乾隆五十九年經各省拏獲解赴楚省歸案審辦首逆爲

劉松宋之清樊學明齊林韓龍謝添繡河南葉縣知縣廖寅  
清拏獲解京首逆爲劉之協湖北陝西四川委員團勇殲斃  
盤獲首逆爲王登廷鮮大川唐大信張子聰陳朝觀崔宗和  
胡明遠林亮功王光祖以上著名賊首凡一百四十二名

白蓮教寇蜀時定遠方有堂積權知梁山縣因閱蜀小紀有蜀  
往經大故其遺民賴結塢自衛語遂訪之土人或云塢卽砦也  
凡山顛地夷曠而四面險絕者則有之方令四鄉以古砦報且  
飭修治使民移穀具械爲禦賊計民或信或否方鞭其不用命  
者工遂畢有七斗砦最大七峯聯屬故以七斗名周圍可八十  
里丁巳夏賊破巴州長壽掠鄰水大竹而東是時鄰水大竹墊  
江長壽豐都忠州六七州縣之人盡東走避賊經城邑不敢納  
恐有賊謀也亦不能納人眾邑小也聞七斗砦大爭趨之一日

夜至者十餘萬人未三日而山童矣其分走他砦者亦十餘萬人梁山民之在砦者不計焉俄而賊大至見諸砦有備又徑險狹難攻且無可掠而去於是人知築砦之利諸郡縣皆效之明年戊午總督勒公保督蜀師廉知其事遂上堅壁清野之議蜀之雷波越嶲邊馬邊四廳所屬夷人焚廬舍掠人畜歲以爲常蜀民受困久矣治蜀者尙姑息勢益張及事不可掩而用兵而兵又不可恃故夷患卒未已也宮刺史晉有夷務紀實一書其狀將吏庸妄選懦殊可歎別有雜語數則頗悉夷事節錄之諗後之治蜀夷者

有土司者熟夷無土司者生夷生夷居山熟夷居村熟夷地佃漢人種之生夷地掠漢人種之名漢人曰娃子女曰蠻丫頭富者蓄數十百口故問夷人之富先娃子次牛馬羊一娃

之價直五牛娃子初至漆其足鍊其耳日入繫以鐵絛邏守  
之日出令耕作惰則鞭箠始無稻穀近亦有之地宜蕎宜豆  
宜燕麥宜包穀收穫以九十月娃子年久配以蠻丫頭生子  
女爲蠻奴才種類本十三支有一支分作四五支者皆冠以  
阿字如阿瓦阿合阿黑之類喜鬪貪財一有不合則打冤家  
燒羊骨卜之吉則傳木刻木刻長一尺刻一二鋸口於上夷  
人視之知於某日在某處打冤家有不至者眾先戮之兵器  
遠用閃標近用弩箭刀彎如鎌其利宜斫有盔甲描金朱漆  
貴者衣之以銀鑲爲最貴俗貴布貴鹽貴菸與夷遇以菸與  
之大喜性尤愛酒屋無牆室無牀臥則倒地相枕藉冬夏一  
褐貴者兩之無鹽沐腥羶若牛羊人死不葬或投於水或焚  
於火無神佛無年節木主亦鋸數齒以爲號强夷與强夷婚

兩夷相見以菸贊最敬者用羊無親誼者往來亦飯之不索  
值再一日則計日取值故其勢散而不聚然與漢鬪則又合  
眾夷爲一旦合生熟夷爲一生夷以熟夷爲間道熟夷以生  
夷爲巢穴熟夷勢敗則委過於生夷生夷則捏一不可知之  
名指一莫須有之地又得熟夷彌縫之袒護之其外若不相  
愜陰實彼此鈎結遂有所恃而不恐夫夷之惡若此誠不可  
縱且其地有竹木之利有金銀銅鐵錫之產征而滅之分爲  
四縣不四五年所得必倍雖然夷地雖小亦不下千餘里人  
亦不下數十萬天欲亡之自漢以來必已有取之者何待今  
日若謂利其竹木正自有辨夷人筍場卽竹利也沿邊之民  
歲入取筍利固不獨在夷至於木則爲地所限夷人不能取  
而付之一炬十餘年後木爛根枯始得開墾彼豈不知 皇



木之利且數十萬計無如水路窒陸路險萬不得已而棄之  
無用之處亦猶滇之萬山老林改作香蕈場也至若金銀銅  
鐵之產非時則嫩嫩者汁不分過時則老者無汁又焉必  
夷地之產之不老不嫩正丁厥時也以不可知之事而欲規  
以爲利無是理也或曰夷所恃者老林烈山澤而焚之夷必  
失所爲斯言者未見老林者也老林之木輪囷離奇高不知  
幾十丈大不知幾十圍苔蘚之厚數寸竭十日之力乾之不  
能何有於焚且彼老林者非夷所惜凡新開之地皆屬老林  
我若爲之縱火豈非彼之深願況過大小涼山更無一夷在  
彼彼不過於亮腳老林作聲援耳緣木求魚無乃爲夷人所  
竊笑也深林無藤蔓苦竹者一望可達謂之亮腳老林或又曰用兵當因糧於敵然  
此非爲夷言之也夷人之糧藏於窖內多者數石惟麥豆可

用蕎子有不食者圓根則食久病人何因之有兵丁喜折銀  
未有不願因賊糧者及無糧可因又復鼓譟向之所折已歸  
烏有故折糧不可折糧而因賊糧則更不可

蜀遭張獻忠之亂人民雕敝縣多歸併如重慶之定遠銅梁安居歸併合州順慶之岳池歸併廣安州厥後戶口繁滋難於綜理康熙六十年總督年羹堯請以定遠仍歸合州安居則歸銅梁與岳池各設知縣等官今安居改爲鄉矣當時歸併者尙有華陽歸併成都雙流歸併新津彰明歸併綿州璧山歸併永川大足歸併榮昌大甯歸併奉節大昌歸併巫山新甯歸併梁山安岳歸併樂至威遠歸併榮縣而成都之彭縣崇甯眉州之彭山青神則未詳歸併何縣雍正七年後始復設惟大昌仍裁蜀中驛路國初由聞中鹽亭潼川以達成都後巡撫噶爾圖

改由劍門關舊路見康熙二十三年所上疏

蜀南江縣一百三十里古柏如簣中一直幹最高者名曰林王  
土人禁盜伐訟者靡歲不有咸豐戊午有縣民左堯臣等至京  
請伐以助餉云可得二千數百萬兩 上命委勘共計柏樹一  
萬三千六百餘株巨料僅一千九百餘株估直不及十萬兩而  
山中運木出南江入大河爲費不貲事乃中輟

灌口繩橋見范成大吳船錄及坡公詩不知廢於何代往松維  
諸路者皆由白沙渡夏秋怒漲多患覆溺嘉慶甲子先太守秋  
漁府君權縣事捐資度地而重建焉橋長數十丈狂流湍盪非  
木石所能施工以鐵索數十密排而貫兩端於兩岸之山石復  
以鐵索橫束之布板其上行者宜急趨徐步則大風簸搖誠有  
類染家晾帛漁曬網者輒足軟不能前矣橋旣成遠邇爭趨更

生有慶逮道光咸豐間余兩官蜀詢繩橋尙無墮壞

威甯州之野馬川有萬人墳明天啟二年西夷之變官民三百三十三姓避亂山洞夷人以火薰死康熙二十八年守備羅全睿拾遺骸瘞之曰萬人墳

大理龍尾關西曰天威逕乃達永昌孔道相傳爲武侯擒孟獲處按七擒七縱之說載籍相沿久矣 純廟力辨之足以破千古之謬

道光癸巳七月二十三日雲南地震一日夜十餘次災最重者爲楊林湯池聞是日人家釜底皆有字多寡不一郭孝廉宗泰課徒十八人於大佛寺樓下人皆死樓上人臥醒見樓板與地平由窗而出皆免又某家婦方哺子壓墻下三日人聞兒啼出之母子皆無恙

永憲錄云達賴喇嘛所居皆奇材異木座旁黃金塔二策旺阿喇蒲坦之難失一塔鋪地以大紅瑪瑙飲食器皿皆黃金有五色蠶吐絲五色諸說蓋當時衛藏未入版圖傳聞奇詭不足据也

熱河喇嘛寺極多最有名者四曰普甯寺札什倫布布達拉大佛寺壯麗工巧皆官建也

蒙古地苦寒一入關則溫煥所感往往以痘症死故諸藩未出痘者免入京師未出痘者謂之生身已出痘者謂之熟身聞國初歲遣太醫赴諸部種痘以便朝覲往來不知信否

養吉齋餘錄卷五終

養吉齋餘錄卷之六

賜進士出身雲貴總督翰林院編修

臣

吳振械

青浦之北地名孔宅漢時至聖後裔避地居此奉至聖衣冠葬焉康熙四十四年南巡至松江道經青浦士民等奏聞 仁廟親書聯額以示表章遺跡之意

雍正二年衍聖公孔傳鐸疏言孔子聖跡圖像唐吳道子畫石刻年久漸泐會聖殿災遂燬聞原任四川巡撫能泰家藏有圖像使人求之因得全板送曲阜乞 御製序文冠之卷首以垂永久 世宗允所請親灑宸翰賜之

顏子廟建於兗在唐開元二十七年嗣建於曲阜在元泰定三年孟子廟建於鄒縣在宋景祐四年曾子廟建於嘉祥縣志稱創始無考惟子思子無專祠元元貞初因鄒縣舊有子思講堂

遂建子思祠後改稱書院明正德元年始以衍聖公次子襲五經博士奉鄒縣書院祀事而曲阜之廟缺焉本朝康熙間博士孔毓埏疏請於闕里孔廟西北隅建祠倣顏曾孟三廟規制春秋二祭載之祀典部議允行

乾隆間列子有子位於十哲 命山東巡撫求其冢及其後裔武城一老翁猶能指其冢所在蓬顙隱蔽僅一坏矣有氏惟一十餘歲童子爲人家牧牛訪尋得之縣官列上其名遂爲五經博士

雍正初山西督臣伊都立疏言 關聖墓在洛陽康熙時授裔孫爵爲博士至解梁原籍似宜一視同仁因 命以解梁嫡裔居斌襲博士十年湖北撫臣王士俊請以荊州後裔設博士守墓奉祀又成都萬里橋南亦有墓相傳先主招魂以葬者歲久



荒圯咸豐初掘地得碑因加培護並建廟以清明歲暮致祭稱  
衣冠廟 御書廟額曰文武聖神

唐昭陵及諸陪葬墓在今醴泉縣九嵎山陵前舊有祭殿而去  
縣數十里後有撤其殿材建祠城中者便祭事也陵及諸墓制  
度方向石墨鐫華及近時孫淵如所撰志紀之甚詳頃道州何  
子貞紹基往游謂諸書紀載山向皆誤子貞足踐其地搜索兩  
日始歸所言當不謬也

陝西華山終南太白三廟春秋致祭太白山神有中左右之稱  
祭時巡撫藩臬分獻殆以山有三靈湫故然不言靈湫而屬之  
山義亦未愜志載大太白池在東三太白池在其西南二太白  
池更在西則左右之稱亦不協三才圖會云山有鐵鑄山神牌  
三曰大阿福二阿福三阿福尤誕妄廟內玉爐一長方式長不

及二尺高八寸厚二寸綠白黑黃糝雜爲章天將雨則津潤欲滴乾隆閒畢秋帆沅撫陝時滿城中掘地得之滿城爲明秦藩皇城或秦府物耶

西安有五嶽廟禮諸侯祭其山川之在境內者一行省而祠五嶽於義非宜碑稱歲久傾圯明正統九年都御史陳鑑修是其來已久今仍春秋致祭所謂有其舉之莫敢廢者耶

無錫寄暢園世稱秦園明隆慶進士湖廣巡撫秦耀舊築歲久蕪廢且割爲僧舍 國初其曾孫德藻號海翁獨力修復遂還舊觀宮諭松齡之父也康熙閒 車駕南巡幸園者凡四海翁率子姪伏謁道左 俯問年齒卽於園中 御書二額以賜寄暢園有樟樹大數抱千年物也 聖祖每幸園撫玩不置回轡後猶憶及之問無恙否查慎行詩云合抱凌雲勢不孤名材

得並豫章無平安上報 天顏喜此樹江南只一株

遵化溫泉在州北福泉山下明武宗時宮妃王氏嘗有詩刻小石壁閒順治閒 敕建宮其旁以白玉石螯爲池康熙二十年大駕以山陵之役至遵化扈從諸臣皆命往觀並賦詩時應制者大學士李蔚以下凡二十二人詩不一格且有爲賦頌者揚州城北梅花嶺古跡也構鹽義倉時取土於此遂成平陸而仍以嶺名名書院鹽義倉者雍正四年巡鹽御史噶爾春疏請以商捐甲辰綱銀二十四萬兩及御史應得公費八萬兩報部撥解 命給噶爾春二萬兩以三十萬於揚州買米穀造倉存備濟荒之用者也

揚州九峯園奇石最高者九遂以名園 高宗南巡選二石入御苑僅存七峯高東井詩云名園九箇丈人尊兩叟蒼顏獨

受恩也似山王通籍去竹林惟有五君存

錦春園在瓜州城北前臨運河中一池皆種荷有樓可望遠帆  
檣雲樹如在畫圖 高宗六次南巡皆駐蹕於此今舊址無復  
存者

東坡洗硯石在南湖顧塘橋蔣氏宅乾隆閒 翠華南幸郡人  
移置城東之萬壽亭映以花石竹木爲游覽勝地 高宗嘗御  
書玉局風流額並製古詩一章

海甯安瀾園本前明滿指揮別業後歸陳氏初名隅園乾隆閒  
南巡閱海塘駐蹕於此益加崇飾擴地百畝門揭安瀾園三  
字 天章也道光初嘗往游樓觀亭榭未盡廢阨而林木皆數  
百年物古翠森竦可愛近聞鞠爲茂草矣瞬息閒盛衰之迹如  
此

西湖舊有花神廟李公衛督浙時自塑其像廁花神中後樓別塑小像并有正夫人及左右夫人之像高宗南巡聞之命卽撤毀改塑湖神後樓則塑花神花后二像

元耶律文正墓在舊山

今稱萬壽山

好山園之東造園時以墓逼近

園門遂培土爲山以匿其迹高宗謂日久無知者墓遂湮滅非所以褒忠勸賢也命所司仍其封域之制復建祠三楹有御製七律一章碑記則汪文端由敦作

明史言毀景帝所營壽陵而葬於金山與殀殤諸王公主墳相屬金山在玉泉山北旣無明樓寶城之制卽繚垣碑久亦頽廢高宗幸香山過其地心惻焉遂有修葺之命

吉林有古木連二三十里不斷遮蔽天日國語謂之窩集平時封禁惟官采參者結侶而入或迷不得出乾隆甲戌聖駕

巡幸經由此路將軍伐樹開路二丈餘樹根不能去路高下不平者截樹爲板覆其上見御製窩集行詩

周忠武公遇吉墓在甯武東門外山上溪流泛濫由墓南衝激而過乾隆乙巳夏大雨水勢益悍幾及墓七月十九日夜墓前土墳起成二高阜延袤數丈逼溪溜中趨衝激之患遂已以公之忠義身後一坏天地鬼神固當呵護之也黃左田尙書督學山西嘗往謁墓所聞如此

甯武參將府東木坊上有劉夫人射賊箭坊高三丈餘箭翎脫盡幹遺二尺許垂下似坊上有賊而仰射者府卽前明總兵署也彭亦香檀有詩云將軍遇吉報國能捐軀夫人拒敵能彎弧每發一矢斃一賊賊多矢盡賊勢逼此獨不中中木坊弩鏃甯愁風雨蝕行人指點舊轅門翟芾山河靈爽存孤篲搖搖危欲

墜如新脫手凌風驚君不見臨淮五代州塔遺箭英姿傳爽颯  
唐有霽雲宋延昭彼尙須眉此門全家忠義竟如此逆賊天  
誅轉盼耳一錘擊死羅公山此賊那足污此矢

江甯府治太平門有箭著於城闕其深沒鏃相傳 國初王師  
入城時都統譚泰所射今土人訛爲潛臺箭

明贈太常萊州太守朱公萬年黔之黎平人也孔有德叛攻萊  
州固守八月以奉朝命授撫而死於賊詳見平叛記歸園日記  
諸書公之遺骸僅一手建祠日納泥像中康熙五十八年有盜  
賊者攫銀物去置手案上修像仍納腹中道光初太守後人某  
至萊訪遺跡萊人館之甚豐祠壁舊畫公守城事蹟遂依壁畫  
別作一冊以贈並贐之而歸二百年後遺民猶感之如此太守  
之功可謂偉矣萊人報之可謂厚矣余至黔黎平朱氏以前冊

索題與在萊所聞皆合

乾隆四十二年彭文勤元瑞以史閣部畫像及其札稿合卷進呈高宗御製詩一章書於卷端 命大學士于文襄敏中書御製書事一篇及閣部復攝政王書於卷端裝潢入篋交兩淮鹽政弄於揚州梅花嶺閣部祠中以卷內詩文畫像札稿勒石祠壁二十年來屢經兵火此卷不可復問

刑部當月官掌收繫罪囚在古雲樓值宿樓額爲尙書韓桂舫封所題取初白白雲樓下坐題詩之句謂是王李當年題詩舊址

禹貢碣石入河說者指爲海運之始秦起黃腫輓遼左且有据杜詩謂唐亦海運者然皆無可詳考元海運最久僅數十萬石明張赫等初運三十萬石最多至七十萬石我朝康熙嘉慶



聞屢議海運未果道光四年十一月十一日大風掣塌高堰湖水盡洩清口涇明年漕不能行協揆英公和連疏請海運下江南督撫議行時蘇藩善化賀公長齡也至上海議水腳雇直定剝兌章程六年二月起至六月上旬止兩次起運蘇藩司所屬四府一州額漕正耗米一百六十三萬三千餘石用江浙海船一千五百六十二自吳淞出口十激放洋至天津之上園剝運交倉中途鬆船拋失耗米八百餘石而已時上海設局募船籌費驗兌催償事皆屬之又檄武員押運文員至天津交米崇明狼山登州三鎮總兵官舟師會哨以備不虞事竣 敕加天后安瀾利運四字封號 御書風神海神廟匾在事文武官及紳商耆舵獎賚有差賀公遂刊海運全案一書七年仍行河運時余方守登州比冬奉檄議海運巡哨事謂明年將復行也而卒

不行迨咸豐元二年江蘇之蘇松常鎮太四府一州復行海運計米一百數萬餘石二年浙漕亦海運十二月起運正月開兌計米六十餘萬石其時以豐工決口及起運過遲不能回空是以議改乃三年賊陷江甯京口揚州漕路梗阻幸有海運一策已履行之成法具在不至缺天庾正供洵國家之福也浙撫黃公宗漢實司浙漕刊有浙江海運全案初編續編蓋仿賀書爲之者

山東登萊諸郡濱海鹽賤勛值錢一二文浙稍貴勛值錢十餘文至二十餘而已道光癸巳秋冬浙苦雨禾稼盡損而海濱沮洳無鹵可煮場中積鹽立盡價驟踴勛值錢七八十文至一百二十餘文買者不得過五十勛清晨張市頃刻停閉不復出賣時兩淮亦以多雨產鹽不旺請借運蘆鹽由海艘南下或至上

海或至乍浦或至甯波民間始免食淡之苦

漢武封禪至泰山下未及上百官先上拜跪置梨棗錢於道以求福今泰山嶽帝廟及碧霞元君廟香火極盛正月初開山進香者絡繹至距山數舍間架席爲屋鱗次櫛比爲香客食宿所進香者各有獻如金銀錢帛銀男銀女之類皆投殿中祖置錢求福意殿有棚蔽以鐵網四月十三日封山香會始罷是日藩司委官一人同泰安縣令至山檢察錢物謂之掃殿舊時不下萬金後來物力凋敝道人復乘間攫取掃殿所得已不足爲祠宇苦葺之用今兵火頻年香客皆裹足矣

明時泰山有香稅以有司董之至我朝

始裁

魏陳泰傳上事驛書不過六百里夢谿筆談云驛傳舊有三等曰步遞馬遞急腳遞急腳遞最速日行四百里熙甯中又有金

字牌急腳遞以木牌朱漆黃金字日行五百餘里軍前機速處分則自御前發下我朝軍機文書最遽者日行八百里尤爲捷速又步遞卽今鋪遞鋪遞遲緩損失之弊甚多然虛耗冗費而不卽裁者以此亦養民之一事耳嘉慶閒百公齡奏請裁睿廟硃批嚴斥見實錄蓋有鑒於明季之裁驛卒也

蓬萊閣爲觀海最佳處歲久不葺前登州總兵官劉公清撤而新之劉始宦蜀以廉幹聞值教匪之亂嘗單騎至賊首王三槐營賊不敢犯睿廟嘗賜七律一章本性從來不愛錢蜀民何幸見青天其首聯也游擢兩司請改武階遂官於登戢兵惠民而又風流好事如此宜其去而見思也

北海神祠去萊州城西北十八里每歲春秋仲月觀察使者率有司祭焉國有大事則遣官來祭祠有康熙四十二年御書

海天浴日額乾隆十六年 御書萬派朝宗額祠旁蠡勺亭王  
西樵爲掖縣學官時漁洋來省其兄嘗游於此有登高邱而望  
遠海一詩然掖海僅支汊迴不若蓬萊閣上眼界之寬也此十  
餘里多漁家高榆大柳中柴扉厯落曬罾補網可以入畫  
布政使柴公望康熙初守萊州修城浚池岸上夾植桃柳春日  
彌望如繡時有錦城之稱郡城東皆崇山高阜夏秋野水下注  
嚙路皆斷乃於壕外築隄禦之水南入掖河不復爲患人號柴  
公隄壕中遍植芙蕖先大父退庵公乾隆閒游萊猶及見之今  
壕漸淤荷花不可復得又萊州城外東北有高阜可瞰溟渤郡  
志以爲南燕慕容氏所築號爲燕臺舊時又稱望海或是所設  
望海臺以備倭警者明嘉靖閒副使馮時雍築亭其上名曰海  
山見大學士毛紀所爲記乾隆閒按察使沈公廷芳觀察登萊

每與客宴集於此今亦圯矣子在萊時於二事頗有意修復值歲浹饑公私匱乏不克舉柴沈皆吾郡人景仰遺軌輒爲憮然珍珠泉在山東巡撫署西偏大數畝流繞署後由北而東出閘匯入濰河 聖祖東巡愛其澄澈嘗題作霖二字余官濟南數至其地池水清瑩可鑑萬珠噴湧二十四泉中此爲絕勝

曲靖郡城南之七十里有晉爨寶子碑乾隆戊戌已出土卧荒烟蔓草中無過問者滇南修通志時訪碑者未之見近以修南甯縣志得是碑移至城中武侯祠爬剔苔蘚完好可誦碑書大亨四年乙巳考晉安帝元興元年壬寅曾改大亨次年仍稱元興二年至乙巳改義熙爨氏僻在荒裔蓋不知大亨年號未行而仍遵用之耳阮文達公見爨龍顏碑以爲滇南第一石此碑在其前五十七年文體字畫又皆勝惜不爲公所見

畢秋帆沅撰關中金石記八卷自秦訖元計金十三瓦三石七百八十一近日渭陽蔡錫棟增編目錄一冊蔡汝霖補其闕漏及嗣出於其後者自魏大將軍頌以下凡三十五種續刻原書末爲附記云

海昌沈朗山壽榕道光閒游閬中報恩寺土中掘得唐雲卿隸書鮮于氏里門碑高一丈五尺廣五尺可識者九百餘字爲昇至平野構亭覆之

道光壬寅席君介石於襄陽田閒得三石又於臨漢門外得三石一爲故唐功曹參軍張公元弼及夫人邱氏合葬墓誌銘蓋漢陽王柬之父母也一爲處士景之則漢陽王之弟而功曹君之第二子一爲新定太守肫則漢陽王之猶子其豫州鄖縣丞孚河南府參軍軫二碑一丁鳳譔一呂岩說譔則皆漢陽王孫

也其地爲樊西之長豐洲洲屢爲襄水所齧坵隴已不可辨余見揭本字跡皆完好具有虞褚筆意今六石在樊城跨鶴樓興太守存跋云王故宅在城外二里許後改爲衍恩寺 國朝康熙間太守尹會一祀王於其中因名張公祠則此石移置祠下爲宜

道光癸未元氏縣村農掘地得唐建中二年賈夫人墓志末有後一千二百年爲劉黃頭所發十一字與掘者姓名適合計建中二年辛酉至今道光癸未蓋一千四十六年數稍不符然其術亦奇矣

濟南西門外五龍潭其西曰潭西精舍壁嵌顏書竹山聯句桂學博未谷重摹上石者曩安麓村得墨跡於太倉王氏正定梁相國借其於秋碧堂帖中後不知所在及未谷得此真本於山



右高姓知梁本剪標裝成頗有訛誤遂訂正而鐫之

乾隆庚辰朱文正告祭南岳至湯陰謁嵇侍中墓墓在殞村野田中碑爲宋韓魏公所誌文正向村人借木凳登而讀之乃邑人任倫所重錄碑忽搖扞讀竟尙不止亦異事見文正年譜

東坡馬參帖并潁濱詩山谷跋共四石舊在嘉禾陸宣公祠歲久散失順治甲午宣公後人求得之復爲好事者購取其二餘二石遂湮榛蕪中乾隆甲午嶺南梁君宰嘉禾購得人間所藏二石又於祠中牆角并獲二石而四石復完

西湖錢王祠有蘇公表忠觀記乃重摹勒石者原刻僅存二石舊在縣學嘉慶丙辰葺祠錢梅溪泳王之裔孫也請於當道移置祠內

嘉慶閒秀水西埏里重葺街衢得一磚銘文云人豐翁集市井

駢聞後一行云大宋政和三年癸巳歲前又一行云大宋嘉泰元年辛酉歲正月十六日用石重砌其陰刻秀州嘉興縣郭五鄉居住會首胡公佐張世隆精嚴寺淨悟大師有肱張安言羅明之馬悅沈爽費元寶陳章吳拱遍募衆緣同力重砌大市官街一道自韭溪東砌至菩薩橋聖宋政和三年六月十一日下手興工費砌伏願保國安民風調雨順仍願捨錢僧俗施主洎普天之下一切有情增延壽算植福無疆書此謹記泥水都料邵宗仁弟宗義等崇信書磚藏葛廣文星垣家

山東德州有雁塔明洪武三十年建萬厯四十年濟南同知孫森納二石塔中具甲乙科姓氏我朝康熙三十一年州人田侍郎雯重葺補石二別書石記事甲科止康熙乙丑乙科止康熙庚午嗣州人又於原石續刊進士題名至雍正癸丑科舉人

至康熙庚子科又補石二續刊舉人至乾隆丙辰科道光開張  
尙書祥河爲山東糧道駐德州鳩工新之續考進士姓氏自乾  
隆壬戌至道光丙戌科凡十三人舉人自乾隆戊午至道光壬  
辰科凡五十四人書勒於石此本慈恩雁塔故事而廣其義類  
者也

杭州長明寺舊藏貫休畫十六應真像題款作小篆相傳明慈  
聖太后賜紫柏大師者雍正初巡撫李敏達衛移至聖因寺乾  
隆丁丑 高宗南巡謁寺瞻禮以尊者名號沿譯經之舊未合  
梵夾本音亦與章嘉胡圖克圖據梵經所定者互異因依同文  
韻統合音字并位次於畫中原署標誌之外系以贊重爲書籤  
仍歸長明寺供奉

西湖兩巨剎南淨慈北靈隱 國初皆燬於兵後靈隱再興淨

慈積圯久未能復也舜瞿和尚既繼法席度材鳩工經營三十年始克成就方建毘盧閣時四壁乏夯石而官以南山鄰省治禁不得採會上方伐松者發其根得萬石足贅夯石無闕又閣無架梁臨安山村有連理木已度及之而村人不許中元夜合村夢衆僧爲淨慈乞施梁否則將自伐之矣逮曉風拔其木因感而施之故上梁法語云樹生連理之梁地湧積刼之石蓋紀實也

洪武船符織黃絲爲之厚如一錢高九寸濶一尺八寸織雲龍爲欄濶一寸中織一船張帆而行前織皇帝聖旨公差人員經過驛分持此符驗方許應付船隻如無此符擅便給驛各驛官吏不行執法徇情應付者俱各治以重罪宜令準此凡七行五十三字首行十字餘行八字末行三字後綴洪武二十六年月

日蓋以制誥之寶年月旁墨書信字貳百叁拾玖號八字按大明會典洪武二十六年定凡公差人員係軍情重務及奉特旨差遣給驛兵部填給勘合所差人員轉赴內府關領符驗給驛前去事還就便銷繳其給發各王府及山西北平山東陝西廣東福建遼東貴州等處都司布政司各六道雲南都司布政司陝西涼州衛各十道浙江江西湖廣四川廣西布政司及金齒衛各五道都司不與如有軍務以多槩快船飛押凡天下水馬驛遞運所設置馬驢船車什物俱有定例但有損壞缺少將有司并驛所當該官吏坐罪仍督併修理補買自嘉靖三十七年改設內外勘合而符驗不復關此蓋洪武時水驛符驗也舊藏湯雨生副戎貽汾所在杭州時出以示客余與同人皆賦詩雨生工詞翰善畫與琴金陵之陷方病居於家賦絕命詩衣冠投

水死

養吉齋餘錄卷六終

養吉齋餘錄卷之七

賜進士出身雲貴總督翰林院編修臣吳振棫纂

古文孝經孔傳亡於梁續出於隋唐儒辨爭遂至淪棄著述家罕有及者其書蓋久佚矣嘉慶閒杭人汪翼滄貿易日本之長崎輿得此本以歸書中義字作誼未經明皇敕改尤爲古本之徵已刊入鮑氏叢書原本刊於其國之東都紫芝園太宰純序後有一印字曰德夫末稱享保壬子中國康熙十一年也翼滄撰日本碎語亦曰袖海編記畺域山川物產甚備

隋書經籍志載易林十六卷易林變占十六卷皆云焦贛撰今世所傳易林本有漢時舊序云六十四卦變占者王莽時建信天水焦延壽所撰據漢書京房傳焦延壽是昭宣時人不當言王莽時延壽梁人不當言建信天水王莽改千乘郡曰建信天

水郡曰填戎則莽時有建信無天水不當二者兼稱序稱費直  
撰直宜元閒人不當爲王莽時人作序劉向別錄劉歆七畧不  
載易林故藝文志亦無之二劉在費直後直且序之何以二劉  
不加著錄曩讀易林頗疑之而無以辨其誤棲霞牟陌人先生  
廷相篤學士也其言曰漢書崔駰傳駰祖篆王莽時爲建新大  
尹稱疾去在建武初客居滎陽閉門潛思著周易林六十四篇  
易林者王莽時建新大尹崔延壽撰非焦延壽也新信聲同大  
尹形誤天水崔形誤爲焦焦崔同字延壽寫者知有焦不知有  
崔誤崔爲焦因復改篆爲贛又妄取儒林傳語焦延壽獨得隱  
士之說九字附益其後而詞理不屬若贅疣然非其本文甚易  
見本係東漢人之筆而不著其名妄人輒加東萊費直長翁曰  
七字以冠之彼見儒林傳焦京之後卽云費直字長翁東萊人



也因此造意尤可笑云云。陌人又詳考易林以爲觀象玩辭非言災變。焦京之書則長於災變。兩家之說迥不相似。遂改題曰崔氏易林。有嘉慶丙子三月自序。此書自隋志據原序嫁名於焦千餘年後。陌人始發其覆異哉。余在萊州從翟文泉借鈔而世閒尙少知者。又隋志名易林變占。王俞序名大易通變漢序名爲六十四卦變占。東觀漢記名爲周易卦林。崔駰傳稱家林其實卽一書也。

揚子雲劇秦美新爲世譏議。太元擬易世亦罕有讀者。蜀郫人孫瘦石澈嘗爲考證元首文並次元攤瑩捫圖告數錯銜八章每章爲之注散於首測贊詞之間。其弟澍從之講授。因前明唐子畏影宋本增補溫公集註脫誤二百五十餘條。道光閒刊行之澍序謂莽篡國擬周官行夏時劉歆傳會經傳以聾瞽天下

揚子欲顯列其事則無補於劉宗退耕岷陽則將得罪於新室  
故遠託義文近稟漢家正朔以寓故君亡國風雨飄搖室家之  
感九九八十一首陳否泰消長之機刺師辟究王誥無首無之  
旨峻詞危其艱深者以避禍耳云云孫氏弟兄蓋蜀士之秀傑  
而甚好學者聞皆下世矣

唐李筌撰太白陰經爲兵家言者此書最爲近古 國朝四庫  
所收乃范氏天一閣本全書總目云唐書藝文志宋史藝文志  
皆云太白陰經十卷此本止八卷疑非完帙咸豐四年國子監  
生程祖慶以校定家藏本進呈卷首有天無陰陽一篇第九第  
十兩卷有太乙課式向背擇日出師安營察情勝敗之容向背  
神煞門戶龜卜山岡營壘等篇皆爲范氏本所無又以錢氏叢  
書內所載李筌進書表文一通補錄於前於是太白陰經遂有

完本

明嘉靖閒錫山呂氏所弄朱子論語先進一篇註稿真蹟凡二十五章裝成四十二幅筆勢迅疾而遒勁如屈鐵其塗竄處與今傳本閒有異同當爲未定本王文端杰嘗爲之跋今此真蹟不知在何處

宋鄭克因五代和凝父子疑獄集復采摭舊文增益宋事爲折獄龜鑑頗稱於世明時刻本已佚其半諸城李方赤璋煜有舊鈔本稱爲全書而無目錄海甯許珊林槌復於永樂大典中求得之遂成完本惟宋志作二十卷今李鈔本與大典本並八卷蓋原本分二十門門各一卷不知何時合并觀二本行款皆就宋本繕錄則由來久矣今爲李公宗昉所刊又棠陰比事一卷附錄一卷宋桂萬榮撰明吳訥刪補桂本取疑獄集參以折獄

龜鑑比事屬詞仿唐李瀚蒙求之體括以四字韻語而自爲之註明景泰閒吳文恪病其徒拘聲韻對偶而敘次無義乃刪存八十條以事之大小爲先後不復以叶韻相從并稍爲點竄其註又爲補遺二十三事附錄四事別爲一卷今外閒僅有鈔本蓋從四庫全書中錄出者余嘗從胡潤之林翼借觀今潤之歿於王事此書不知存否

宋尤文簡全唐詩話六卷乾隆閒浙人孫濤以搜羅未盡取集中載其人而遺其事者續爲卷七得五十三人人與事俱未載者續爲卷八亦五十三人

斜川集南宋後流傳已寡康熙閒有詔索之不獲故四朝詩中祇錄一首以存其真其餘率因謝幼輿劉改之二人名與叔黨同遂竄其集以欺世據王弇州題跋知以劉集充斜川在元時

已如此乾隆癸巳纂四庫全書山左周編修永年於各韻詩下得叔黨詩文散片若干首其後錢塘余編修集於孫中翰溶所見此稿本以告仁和吳麗煌長元麗煌借歸錄副又從宋文鑑東坡全集播芳大全諸書訂譌補闕釐爲六卷寄致鮑渌飲先一年武進趙味辛懷玉集翁覃溪學士齋見此書亦採自永樂大典者以請急南下未及錄稿旣而於鮑氏見之復加校閱有可據引者條疏於下遂刊入知不足齋叢書迨嘉慶戊辰詔輯全唐文法時帆式善充總纂檢永樂大典復得遺詩五十三首文十五篇勒爲二卷皆前刻未收者而叢書中僅載時帆跋語詩文二卷未補入也

劉壎字起潛家南豐之淺村自號水雲元初任本州學正擢延平路教授所著書一百三十五卷傳者爲隱居通議三十一卷

水雲村泯藁二十卷吟稿十二卷隱居通議水雲村稿四庫館書目已著錄惟書目載水雲村稿十五卷自十六卷以下以爲有目無書而劉氏藏本則未嘗闕佚且亦不盡青詞祝文吟稿則四庫目未載其十九世孫斌任浙江布政司刊隱居通議斌子斯湄任山東布政司刊泯藁吟稿後附刊恕庵遺稿一卷爾齋文集一卷恕庵名冠寰宇尙之嘗編古今詩文曰詩文廣輪水雲十三世孫也爾齋名凝字二至號籀堂康熙閒官崇義訓導著有詠原表說文解字詠原石鼓文定本王文成公經營橫水方畧詠原全書六書夬說說文解字夬恕庵孫也

仁和阮泰元讀于忠肅公旌功錄志感詩序云斯錄在壬午夏嘉靖元年先祖檜屏公永訣時手授泰元云予供事實錄獲睹諫易儲一疏憲宗簡及爲之流涕又有請復儲二疏英宗未及簡發

爲人臣者當以肅愍爲法

于公初肅愍

爾其志之云云阮氏所云三

疏鮮有知者朱文正與修明紀綱目時亦未見故有詩云昔編

明紀未博考誌此逸事傳無窮

頃從孫稼亭福清借讀安危注四卷吳姓輯姓字專愚號鹿友揚州興化人明季大學士嘗命督師後爲他宰執構陷謫戍鼎革後隱潭涇因用漢陸生語爲此書上自留侯終於信國皆有論斷留侯始終爲韓信國不忘報宋蓋惓惓之意如此

明臨海朱伯賢所定唐宋文卽韓柳歐陽三蘇曾王八家曰六家者合蘇氏爲一也世傳茅選蓋後出

毛西河先生所著書已刻者凡經集五十一種二百三十六卷文集六十六種二百五十七卷共四百九十三卷古稱集之多者自沈約後稱唐之元白宋之歐蘇然休文集一百卷元白長

慶集合一百八十五卷歐集一百十四卷東坡合南征南省黃州北歸儋耳諸集亦僅一百七十五卷未有若西河合集之多者歿未百年板歸坊賈剝蝕散佚厯久滋甚乾隆閒同里陸君體元聞風太息因轉句戚屬不惜重貲買歸於家修其殘缺補其遺亡并以印本分餉邑之鄉先生與官斯土者今板尙存陸氏完好無恙

韻書所以別聲不爲詩設詩韻之稱毛西河謂爲試韻之訛前人誚其臆說元吳澄支言集有張壽翁事韻掇英序曰荆國東坡山谷始以用韻奇險爲工倘記覽之博不及前賢則不能免於檢閱於是乎有詩韻等書然其中往往陳腐用之不能起人意云云然則其始以韻府之類便於作詩押韻故謂之詩韻耳竹垞經義考旣類次爾雅二卷而形聲訓詁之屬闕焉南康謝



蘊山中丞啟昆撰小學考五十卷補之謂小學皆所以解經也  
首 敕撰次訓詁次文字次聲韻次音義書成後其子觀察公  
嘗刊板而流布未廣旋燬於火其孫蔚青刺史質卿欲重刊而  
覓外閒印本不可得咸豐閒忽於長安市中見書簿有此書名  
急詢之則已爲人購去宛轉商之贖以重價復行校刊前有翁  
覃溪錢竹汀姚姬傳諸序蔚青今爲乾州牧

梅定九文鼎年二十七從竹冠道士倪觀潮受麻孟璿所藏臺  
官交食法卽爲訂補注釋成厯學駢枝四卷竹冠歎服康熙閒  
相國安溪李公以厯學疑問三卷進呈乙酉南巡 召見於德  
州舟次者三從容問答賜坐移時賜 御書績學參微四大字  
謂相國曰此學世鮮知者其人佳士惜老矣眷注之隆如此所  
著厯學書六十二種已刻者十七種算學書二十六種已刻者

十六種想其日久湮滅復臚列書名各繫數語發揮撰述本旨爲勿庵厯算書目一卷勿庵其別號也

新安姚際恆首原康熙間人撰詩經通論十七卷前有論旨一卷大意謂漢人之失在於固宋人之失在於妄明人之失在於鑿欲掃去臆論新譚惟導繹文義辨別前說從其是而去其非此書世無傳者韓城王文端家有鈔本其孫寶珊方伯篤刊於蜀

雙就園成杭州駐防官西安副都統咸豐乙卯於市上購書一冊乃其先世太傅端純公佟國維所著卦爻解義命其子德克新作序隆科多繕錄者冊爲康熙丙戌錄成百數十餘年矣不知何時流落關中適爲其後人所獲西河集有佟國舅一等公周易註序當別爲一書也隆科多以二十一罪款論死其書法

秀整頗近晉唐人隆科多爲太傅第三子有弟慶福後襲公爵德克新亦不知爲長爲次

明萬厯間連江陳第字季三號一齋由京營厯官游擊有將畧尤喜讀書藏書萬餘卷有世善堂藏書目錄入本朝子孫不能守乾隆初錢塘趙谷林昱齋金往購已散佚無遺矣勾得其家目錄谷林稱爲斷種秘冊者約三百餘種鮑涿飲廷博按目而求四十年一無所獲

甯波范氏天一閣藏書爲天下冠阮公元撫浙時刊其書目爲四卷又以類分帙共爲十卷兵火之後蓋散失不少矣

青浦王述庵侍郎昶藏書甚夥其卷端皆有印識其文云二萬卷書可貴一千通金石備購且藏劇勞勩願後人勤講肄專文章明義理習典故兼游藝時整齊勿廢墜如不材敢賣棄是非

人犬豕類屏出族加鞭箠近聞其家舊藏已不能守良可歎息  
國家文化翔洽篤學之士剴經緝史網羅百家卽以吾兩浙言  
則有若趙氏小山堂盧氏抱經堂汪氏振綺堂吳氏瓶花齋孫  
氏壽松堂郁氏東嘯軒吳氏拜經樓鄭氏二老閣金氏桐華館  
收藏皆極富今故家雕落遺籍散亡復遭兵燹盡付劫灰可勝  
浩歎

鮑淥飲名廷博字以文歙人遷烏程之烏鎮生平於書無所不  
窺搜緝宏富參校精審乾隆閒開四庫館進書三百餘種奉圖  
書集成之賜後刊知不足齋叢書 仁宗傳諭撫臣曰朕讀鮑  
氏叢書名知不足齋與宮內齋名同爲語鮑氏勿改朕帝王家  
之知不足鮑氏乃讀書人知不足也二十五集進呈蒙 賜舉  
人後刊至二十八集年八十卒於家

乾隆時博訪遺編進書百種以上者擇其精本 御製詩章題  
識簡端三十年以浙江鮑士恭范懋柱汪啟淑兩淮馬裕四家  
所進書多至六七百種各 賜古今圖書集成一部又進書百  
種以上之江蘇周厚堉蔣曾瑩浙江吳玉墀孫仰曾汪汝璥及  
朝紳中黃登賢紀昀勵守謙汪如藻等各 賜初印佩文韻府  
一部

紀文達家藏順治閒縉紳冊法梧門跋定爲辛丑年以王西樵  
次年遷考功也時王文簡爲揚州推官冊後又有阮文達跋云  
其家藏有前明天啟縉紳冊

何子貞編修紹基於長安書肆買得明壬戌翰林館課五冊附  
己未館課二冊爲金陵廣慶堂梓行前刻修撰編修庶吉士姓  
氏其課題有論序議疏詔敕表露布檄解狀問對賦頌說記箴

銘啟詩詩亦備古律諸體非場屋八韻與今之館課僅以詩賦者異

乾隆戊子翁覃溪方綱視學粵東得坡書天際烏雲帖墨跡又在英德南山後壁見坡公手題重摹二石以一嵌廣州使院壁一以自隨因自號蘇齋癸巳以所摹蘇米二石嵌齋壁蘇蹟卽南山石米蹟則藥洲九曜石之一也因題扁曰蘇米齋是冬購得宋槧蘇詩施顧注三十一冊凡存目一卷詩三十卷卽宋漫堂舊藏本有毛氏汲古閣宋商邱諸印乃復題扁曰寶蘇堂覃溪工蠅頭書用文待詔故事四句後元旦以瓜仁一粒書坡公金殿當頭紫閣重絕句一首又每於一粒胡麻上書一片冰心在玉壺七字六句後又以胡麻十粒粘紅紙帖每粒作天下太平字戊寅元旦書至第七粒目倦不能書歎曰吾其衰矣果

以是月二十七日遽歿

陳枚孫祐金昆戴洪程志道有合畫清明上河圖孫祐周鯤丁觀鵬有合畫十八學士圖卽世甯唐岱沈源有合畫幽風圖又唐岱沈源合畫幽風圖皆國朝畫院中尤有名者

蘭亭之會尙矣唐大厯中朱迪呂謂吳筠章八元等三十七人經蘭亭故池聯句有賞是文辭會歡同癸丑年之句迨元至正間參軍劉仁本仿蘭亭故事修禊於秘園湖會者二十四人頗傳人口乾隆十一年丙寅閏三月三日杭州太守滿洲鄂筠亭敏修禊事於西湖賦四言五言詩會者凡六十一人錢唐梁谿父文濂周穆門京金江聲志章金冬心農厲樊榭鶚丁龍泓敬張柳漁湄陳句山兆崙陳眉山兆嶠呂耜堂伊吳甌亭城施竹田安陸抑齋秩吳藍田玉增施北庭亭樞周聞鶴宸望丁誠叔

健吳奐若璠增施大醕學濂吳蘭林玉墀厲繡周志黼仁和許  
初觀大綸孫晴湖陳典胡質孚旣汪復園臺梁設林啟心顧耕  
欄正謙杭堇浦世駿王茨檐曾祥顧寸田之麟張南漪增皇甫  
藥坡鯤孫瑤圃庭蘭杭縣圃世瑞趙勿藥一清吳萬洲中麟歸  
安茅湘客應奎孫武水林慈溪鄭雪崖羽遠會稽魯秋塍曾煜  
平湖陸恬浦培張鐵珊雲錦葉迎坡鑾陸雲軒騰海寧施蘭垞  
謙許復齋承祖鄞縣全謝山祖望秀水錢籜石載德清徐南墅  
以震徐柳樊以泰徐根苑以坤衲子則玆虛明中讓山篆玉其  
非浙產者南陵劉迴含琦歙縣汪秀峯啟淑宣城施藥齋念曾  
滿洲舒雲亭瞻長沙周雪舫宣猷閩縣林餘齋緒光及筠亭太  
守也太守彙刊其詩而明中爲之圖穆門爲之序

乾隆閒高密李石桐懷民因楊升庵詩話言晚唐詩一派學張



籍一派學賈島遂倣張爲主客圖爲中晚唐詩主客圖二卷上卷以張水部爲清真雅正主上入室朱慶餘入室王建於鵠升堂項斯許渾司空圖姚合及門趙嘏顧非熊任翻劉得仁鄭巢李咸用章孝標崔塗下卷以賈長江爲清奇僻苦主上入室李洞入室周賀喻鳧曹松升堂馬戴裴說許棠唐求及門張祜鄭谷方干于鄴林寬石桐詩學水部弟少鶴憲喬學長江及門之士皆守師法時謂之高密派

漢初有白國王其夷爲白人後爲爨王則爲爨人爨蠻之名甚久有號盧鹿蠻者字譌爲獠獠兩迤之內依山谷險阻者皆是詳見皇朝職貢圖及郡邑志嘉慶閒雲貴總督伯公麟以諸種人輯爲圖說上呈 乙覽尤爲詳備又夷經皆爨字狀類蝌蚪爲納垢曾阿丁所撰

騰越志作納垢酋阿阿撰

字凡十千八百四十有奇命

曰臚書稱其人爲書祖

道光二十五年俄羅斯國呈進本國書籍一種由薩那特衙門移送庫倫辦事大臣委解京師計三百五十七號八百餘冊圖二十二儀器二具奉 旨交理藩院收藏其書皆俄羅斯字譯出書目凡天文地理兵書戰法礮械醫藥種樹本國各國史傳詩文集性理經解律例之類宏纖備陳地圖尤爲詳悉

養吉齋餘錄卷七終

養吉齋餘錄卷之八

賜進士出身雲貴總督翰林院編修臣吳振棫纂

慎郡王允禧 聖祖第二十一子雍正間封貝子晉貝勒乾隆  
初晉郡王尙風節樂交寒素號紫瓊名若道人嘗作六君咏謂陳  
恪勤鵬年趙恭毅申喬沈文恪荃王文簡士禎查二瞻士標王  
石谷輩蓋王兼詩書畫三長故詠沈王諸人陳趙爲名臣則志  
向慕意也

范文肅文程爲開國名臣順治間以疾告 世祖親和藥餌馳  
賜十四年遣工就第圖其貌藏之大內

順治乙未會試題詩可以興七句會元素斌卷本房初閱以其  
平而棄之會 世祖作此題文試官探知破題爲詩教有七亟  
欲索七股格者遍索不得閱秦落卷乃七股遂置第一臚唱日

一甲至二名不及秦 世祖色不懌至第三名爲秦卷 世祖大悅曰吾意此人必鼎甲也 賜袍服特比狀元時以爲異數 順治戊戌狀元爲常熟孫承恩 世祖甚重之孫時方生一子 世祖問爾子曾取名乎對曰未也 世祖曰爾是狀元盍名爲元旣而曰狀元爾已做將來可爲相當名相未幾孫卒子亦坎坷終身 恩眷雖渥無如命何

徐立齋元文順治己亥廷試第一 世祖召見乾清門還啟 太皇太后曰今歲得一佳狀元嘗從幸南苑 賜乘御馬命學士折公庫納爲執鞚公以館師辭乃改命侍衛又嘗晚對便殿夜分 賜饌 世祖問從者得無饑乎命賜之食一日攜公至僧忞蕉園方丈問以釋氏書公謝不習 世祖亦不强之語曰此人大有見解狀元朕所親拔朕門生也忞與左右稱賀

順治間有 詔命詞臣修玉匣元帝化書檢討淄川唐濟武先生上書以爲不宜崇此非聖之書妄費紙筆爲聖學玷又爭御史張煊給事中陰潤事忤旨罷歸

康熙癸丑冬 召熊賜履葉方藹張敦復韓莢至起居注館作太極圖說取熊第一因問平日所著書以閑道錄進呈 聖祖稱善 命裝潢親題其簽曰熊學士閑道錄迨罷歸僑居金陵十餘年稱清涼老圃 聖祖南巡迎蹕道左 念舊時講幄之勞賜羊四腔酒一尊果三盤脯四束復賜御筆太極圖說一卷御書 聖製中秋卽事詩一軸後復內召洊擢大學士以母喪歸及南巡復郊迎 上駐馬慰問旋賜御用鹿尾等物又賜人蔭十觔及御題經義齋扁額

熊文端賜履歿後 聖祖以其長子愚駟次子尙幼其爲試官

時所取門生不下千人令諸臣扶助以望成就於是門生尙書王鴻緒等非門生大學士王揆王頊齡等助銀三千餘兩命交江甯織造曹頌生息給其家文端長子志伊嘗召見不能奏對授編修歸里次子志契志夔志契乾隆初錄用爲翰林孔目

高文良其倬奉天鑲白旗人康熙甲辰進士著味和堂詩集當擇萬年吉地時命往審定文良目短視賜以千里鏡王揆字藻如太倉人康熙庚戌進士明大學士錫爵之曾孫父時敏字烟客以畫名生九子皆貴顯揆其季也六十年冬奏請復二阿哥儲位奉旨切責雍正元年年八十乞休命以原官致仕當時東宮再廢虛位者十年揆未識天命所在妄有論列而心本無他究勝臧默故聖祖優容之

蔣伊字渭公常熟人康熙癸丑進士官至河南提學副使康熙十八年進十二圖一難民妻女圖二刑獄圖三寒窗讀書圖四春耕夏耘圖五催科圖六驚兒圖七水災圖八旱災圖九觀榜圖十廢書圖十一暴關圖十二疲驛圖疏請俯賜覽觀庶幾顛連瑣尾之狀纍纍乎如在目也呻吟愴歎之聲殷殷乎如在耳也其致君堯舜之意可謂深切矣

學士孫在豐從獵南苑有鷹銜而走聖祖以御用弓矢授在豐射得鷹遂賜之謂大臣曰孫在豐文武才也及試武進士復命之射射連中

康熙間張文貞之父張九徵歿命閣學王鴻緒奠茶酒母沙太夫人歿命閣學布泰徐嘉炎奠茶酒先是因母病乞假歸省賜其母御書金剛經五部并鹿尾一盤

張文敏公照相傳爲斷臂僧後身初名默後易名照年十四入  
庠十七舉於鄉十八成進士引見時奏照年幼未習吏事願讀  
中秘書 仁廟顧左右曰此人頗有膽散館以檢討供奉 內  
廷 憲廟卽位問張文和廷臣中有通禪悅者否文和以張照  
對因召問曰視朕何人對曰是佛汝自視何人對曰乾屎橛言  
下大契詳見許元仲三異筆談

文敏嘗置義莊千畝奏明奉祖遺命蒙追授少宰給封典三代  
並建特祠於橫雲山之下春秋遣官致祭實爲曠典祠外爲橫  
雲山莊竹木環而有宿雲菴尊經閣諸勝又以蘇松高阜地非  
多金不能得一穴因捐地若干畝爲義冢咸豐間其從曾孫祥  
河官尙書復有捐地備葬之奏

張清恪伯行撫江南與總督噶禮不合康熙辛卯江南鄉試物



議沸騰有左邱明兩目無珠趙子龍一身是膽語謂主司左必  
蕃趙晉也而蘇州士子復迎財神入文廟事聞 詔尙書張鵬  
翮與督撫按驗總督故驕橫欲遏其事清恪疏劾督臣抗旨欺  
君營私壞法噶禮亦以他事誣奏 詔俱解任以張鵬翮赫壽  
按之謂清恪所劾全虛革職治罪噶禮免議復 詔尙書穆和  
倫張廷樞再審審如前議 聖祖以清恪天下清官第一此議  
是非顛倒命九卿臺諫矢公再議九卿持平上翼日命清恪留  
任噶禮革職科場作弊之人尋亦正法江蘇士子榜於門曰  
天子聖明還我天下第一清官

雍正初清恪爲禮部尙書以宋五子書集解進呈 世宗親書  
理學名臣四字賜之召對以年老諭免跪或奏事跪久輒命內  
侍扶之起凡祭祀大禮如郊壇視牲辟雍祭告向皆王公大學

士之事特命清恪行之而闕里追封先聖五代命以便道歸省其家尤異數云

郝雪海浴巡按四川策吳三桂必反疏陳其跋扈狀三桂銜之以他事誣奏流盛京康熙間復起爲御史累官廣東巡撫以勞卒前撫傅某以軍興不時挪移庫金逾四萬兩公請以庫項扣抵諸務倥偬未及扣也護印者劾公侵欺部議落職追補聖祖言公前任巡鹽後任巡撫皆潔己愛民免奪官並免追庫項以昭優恤廉吏至意

彭中丞鵬閩人耿精忠之亂逼降不從盡去其齒後爲三河令行取工科給事中彈劾權要舉朝憚之與山東郭公琇齊名陳啟泰遼東人康熙間任漳南道耿精忠叛啟泰度事不可支令妻劉氏及妾婢幼女二十一人先就縊僚屬畢至啟泰慷慨

陳義各慰遣之遂朝服再拜自經其子汝器未隨任聞遇害赴漳迎櫬爲海賊鄭錦劫之去越二年乘間脫歸 聖祖以其父子忠義加贈啟泰工部侍郎授汝器右通政二十年正月 聖祖御乾清宮賜宴以汝器及光祿卿馬世濟父皆殉難 特召至御座前賜之酒

湯文正侍直時 聖祖命錄詩文進覽有年老才將盡憂多道轉親句 聖祖思久之曰何謂憂多道轉親文正對曰臣幼遭亂離半生在憂患中隨事體驗道理轉覺親切天顏和霽從容顧問 聖主優禮儒臣古未有也

康熙中臺臣有請濬海口者 聖祖遣官行視還奏當如臺臣言河臣冀董其役而 朝命乃屬之皖臬于清端河臣大失望因別劄一議疏上之下九卿議多右河臣者實應喬子靜萊聞

之言其害於司空司空曰事必行矣言之何益會 聖祖以役大費重意未決復 命詢淮揚人之官京師者河臣使其客以重賄啗子靜子靜笑卻之淮揚士大夫集子靜所子靜昌言曰如河臣言有大害四某當以死爭諸人聞所陳說咸以爲然乃篝燈草議明日入直起居注是日秋決故事賜閣臣及講官飯子靜方爲講官與焉旣而 駕御南煖閣 聖祖顧問某學士曰海口事如何某學士亦右河臣復顧問子靜因力言不可狀 聖祖曰爾一人意乎對曰淮揚人皆同臣有公議當奏上翼日進議復至會議所具論得失主河臣者噤不能發聲於是議遂寢戶尙梁公清標歎曰江淮之間可謂有人

斯文襄爲 國朝治河名臣幕客陳潢錢塘人善治水文襄用其策遂有成功嘗著河防摘要一書同里張靄生復纂河防述

言一卷附之康熙二十三年 聖祖特授潢僉事道令贊理河務其後兩河旣奠潢倣古溝洫法爲溝田之制先於安東近湖地試民屯墾有效因力贊文襄開屯收息以業兩河游食貧民補厯年糜帑兼備後此防河經費構廬分界歸者如市闢土漸廣佔利私墾者多有司清釐奸民騰謗忌者乘之文襄與潢皆削職潢死文襄再起以義友竭忠疏陳於 朝得追復其官文襄所治如堤堰壩塞清口潭改南運口於太平壩疏皂河闢中河其議悉自潢發之故疏陳懇款自言不敢冒功罔上以負死友文襄功名彪炳國史而潢事尠有知者

滄州陳公鵬年知江甯府以爭加賦事爲總督阿山所惡假事誣劾陳後復起知蘇州重游虎邱詩云雪艇松龕閱歲時廿年踪跡鳥魚知春風再掃生公石落照仍銜短簿祠雨後萬松全

卷之六  
六  
逕匝雲中雙塔半迷離夕佳亭上憑闌處紅葉空山繞夢思塵  
鞅公餘半晌閒青鞋布襪也看山離宮露出雲霄上法駕春留  
紫翠間代謝已憐金氣盡再來偏笑石頭頑棟花風後游人歇  
一任鷗盟數往還總督噶禮以爲誹謗復劾奏之摘印下獄  
聖祖謂詩人諷詠各有寄託豈可有意羅織以入人罪 命復  
其官後累官至江甯布政使

魏敏果在臺垣一日與吏尙王公永吉遇於途魏當迴避王堅  
請魏小轎先行次日令其宗人語魏曰吾每過魏公門巷間寂  
若無人者吾甚敬之若避我則我心何安後弗復爾魏平時不  
謁權貴大學士金公之俊請告去官詣伏魔庵菴與魏寓近謂  
老僧曰吾慕魏公恨未識面今將歸矣可一見否僧以告之乃  
走晤

敏果嘗夢葛巾青衣儒縹者二人召之曰先師召汝魏從之至一處宮殿崔巍導入殿門命行禮二人鳴贊先行九拜禮曰此先王之禮後行三跪九叩禮曰此時王之制拜畢賜飯一盂筋一雙食畢命出魏曰可到地處否乃導之謁四賢祠堂三間內四人分坐分兩層上層二人一貌清明一貌蒼古下層正坐一人貌修偉面東側坐一人黑而髯命行四拜禮正坐者閉目不言側坐者呼魏名厲聲曰范祖禹說你有些好處你勉勵著唯唯而退二人復從舊路導之歸寓乃寤魏生平好談夢此夢尤奇

敏果嘗爲益都馮相國所薦馮魏同榜進士而無深交一日魏叩馮所以薦者馮曰余爲祭酒值丁祭凡不與祭者例於前一日瞻拜公每期必至一日大雨泥深三尺同官曰此番必無一

人來矣未幾公至肅然瞻拜而去此外果無一來者此余之此以知公也

哲勒肯滿洲正白旗人由中書累官至尙書聖祖嘗與大學士馬齊論在廷諸學士追憶哲勒肯批本最速且言其草書敏捷時稱飛手爲褒美云

覺羅武默納滿洲廂黃旗人康熙間以內大臣奉詔往視長白山還京疏聞因加長白山封號秩祀如五嶽聖祖嘗召入養心殿命工繪其象以賜諭曰將此像與爾子孫世世供養雍正間以鄂文端爾泰總督雲貴廣西鑄三省總督印合對文端年命擇吉日命怡親王在養心殿監鑄文端在滇恩賜稠疊不可殫紀嘗賜四團龍補服及龍袍又賜內庫銀四萬兩世宗五十萬壽宴廷臣特留親嘗克食一盒及御筵果餌寄賜



又元旦御用團圓餅特留一枚賜之此皆逾格恩眷非尋常賜物比

黎志遠字甯先閩之長汀人康熙己丑進士爲御史時密劾年羹堯專擅貪汙世宗納其疏不下羹堯敗乃出以示羣臣嘉其剛正進大理寺卿

魏廷珍字君弼景州人康熙癸巳探花性骨鯁爲漕督時文覺國師南行朝山儀衛尊嚴地方大吏膜拜如弟子至淮關督年希堯首行此禮河督嵇文敏不得已從之魏獨直立不拜且上疏言臣不能從佛法世宗亦不之罪

雍正間以年羹堯在京房屋一所奴婢二百二十五口金銀綾綺衣物器皿賜左都御史蔡珽奏言房屋乃國家舊賜羹堯者奴婢則內府所隸之人旣蒙恩賚臣不敢辭若金銀綾

綺等皆不可問之物釋氏有言審已功德量彼來處臣不敢受  
王文恭頊齡華亭人由翰林累官武英殿大學士松江海口潮  
日再至文恭拜相時一日三潮人以爲異後以老乞歸凡三請  
雍正二年始致仕 命俟 孝恭仁皇后服除歸里口占云從  
此光陰爲我有當時白傅詠清娛分司猶有行香務爭似歸田  
一事無乃竟不及歸而卒數爲之也卒年八十一

雍正間鴻少張應詔字圖南湖南人嘗官兩淮運使巡鹽御史  
承貪吏之後整飭廉隅一塵不染故鄉親族來冀沾潤者一切  
謝絕遂有發其先塋以洩怒者卒亦不悔家惟小屋數椽瘠田  
半畝可謂處脂膏而不潤矣

雍正間明史館纂修葉滋舉人也署湖廣總督福敏奏帶赴楚  
五年赴禮部試 特賜召見 諭令回楚不必候榜如中式以

此次召見准殿試是科中式特賜第二甲第十名進士曠典也  
福敏奏謝請授以文學侍從之任 世宗批諭謂其才可用爲  
郡守

世宗嘗問侍郎李紱曰汝於書無所不見則二氏諒所盡通紱  
對曰臣向於藏經亦諦觀之然甚無補於天下國家 世宗笑  
而頷之又嘗問沈端恪近思汝嘗爲僧宗門精詣試言之端恪  
對曰臣幸得通籍方留心世事以報國家不復更念及此 皇  
上聖明天縱早悟大乘然萬幾爲重臣願 皇上爲堯舜不願  
皇上爲釋迦 上改容禮之

高安朱文端兩朝相業彪炳一時及薨於位 高宗賜奠就坐  
地書帝師元輔四字爲挽額

乾隆癸卯王文端以總憲丁母憂家居明年年六十起授兵部

尙書時 高宗方南巡文端趨行在謝 恩 高宗曰汝來甚好君臣之情當如是然汝儒者朕不欲奪汝情歸終制可也文端感泣陛辭朱文正方扈從歎曰 上之待公厚矣

乾隆間編修沈德潛初授職隨班引見 上諭輔臣云沈德潛老名士令和消夏詩十首餘願和者亦和時於內閣軍機房分給筆札 賜飯及餅餌瓜果同和者編修裘曰修蔣麟昌鞠遜行檢討陳世烈廖鴻章翌日 賜文紗越葛有差

方恪敏觀承嘗攜其子入見 上解佩囊以賜又 命御醫爲其子種痘故恪敏詩云造膝幾人容抱子眷懷昨歲詔迎醫 梁文莊詩正在 上書房爲 高宗作擘窠大字 世宗駕至諸臣鵠立以俟 世宗仍命文莊書墨漬於袖又命 高宗曳之文莊遂弄此衣三十餘年囑他日服此就木志 君恩也

乾隆辛巳殿試將軍兆惠方奏凱歸 高宗隆其遇特派讀卷  
兆自陳不習漢文 上諭以諸臣各有圈點圈多卽佳卷兆檢  
得趙翼卷九圈遂定第一先是卷皆彌封是科以御史奏改先  
拆封第一趙翼江南人第二胡高望浙江人第三王杰陝西人  
因問讀卷大臣曰 本朝陝西曾有狀元否對曰未有 上卽  
以王爲第一趙爲第三越日 諭諸臣曰趙翼文自佳然江浙  
多狀元陝西則 本朝未有與一狀元不爲過是時西師凱還  
而西人適得元誠佳話也

乾隆時黔撫宮公兆麟長於應對 高宗亦言其口給時有鐵  
嘴之號聞於禁中

乾隆間和相當國時河南謝向亭振定爲御史和有妾之兄驅  
車市中奢僭踰制謝焚之於中衢道光間其子興曉由州牧用

薦入覲詢及家世上憶其事謂樞臣曰謝某乃燒車御史之子也未幾擢興曉知府

和相柄國時聲勢薰灼人人結舌惟御史曹錫寶劾其家奴劉全倚勢營私事閱數年和抵法籍劉全家資二十餘萬仁宗以錫寶能不避權貴抗詞執奏命追贈副都御史銜其子照贈銜予廕以旌直臣

朱文正自乾隆丙申入侍仁宗於書房其後奉使於外仁宗篤念舊學每形之詩篇屢頒手札共一百三十九件親政後文正奉召至京恭繳仁宗復將累年賜詩親選御書裝成二冊以賜上冊題籤曰蒹葭遠目題冊首曰錦鱗雅什下冊題籤曰山海遙思題冊首曰秋水怡神及文正薨仁宗御製挽章十二韻命南書房翰林黃鉞恭錄焚於靈前

嘉慶戊辰春闈諸總裁覆命 上諭曰大學士朱珪爲乾隆戊辰進士今年又值戊辰朕心默禱所得之士必有如朱師傅者方謂得人次年己巳有江蘇知縣李毓昌查賑持正爲山陽令王仲漢毒斃事發鞠實 賜李諡忠愍製憫忠詩以紀之癸酉林清之變滑縣知縣強克捷先發李文成牛亮成之奸遂斷林清應援而滑城破時克捷一家三十五口皆殉難 上諭有實屬傑出良臣功在社稷之語 賜諡忠烈二公卽戊辰進士也廓爾喀不靖時大學士公福康安督師勢張甚鈴下廝養憑藉搏噬無敢撓其鋒一日與夫撓良家婦釵珥都司徐斐見而訶禁其黨伍摔徐撻辱之冠服皆裂外舅姚公令儀方守成都捕治之會大學士欲謁客關者言與夫爲姚知府捕治矣大學士怒曰守敢爾耶詰其事則抗詞以對時已奏擢川東觀察乃遣

騎追原疏還而寢其事然直聲震軍中矣公婁縣人以乾隆丁酉拔貢起家崎嶇戎馬間累官四川布政使

余由翰林出守大理歸省老親時座師章文簡予告亦居杭州往問莅官行政之道公曰勤儉而已無他言退而思之以勤補拙以儉養廉居官之要無踰於此公所居爲前明金氏別業

陳午橋鴻錢塘人由翰林累擢至通參宣宗登極詔求直言君上聽言用人理財疏娓娓數千言又請復輪班日講及畿輔營田水利事言尤切中天下想望其風采在諫垣時嘗稽察銀庫庫積弊久向者皆有所利縱不問趙公佩湘馭庫吏少嚴一日由庫歸遽歿疑者以爲中毒故人益不敢問君受事必親視出納杜虛收虛放諸弊他官吏恨次骨君奮然不顧然在庫亦勺水不敢飲懲趙事也後數年假照截留之獄起事皆由銀庫



牽引至千餘人吏臨刑有歎者曰使人人如陳御史我輩安至此耶

養吉齋餘錄卷八終

養吉齋餘錄卷之九

賜進士出身雲貴總督翰林院編修

臣吳振棫纂

傅青主山生平詩文隨作隨棄家無藏稿戴楓仲搜輯爲霜紅龕集久佚陽曲張思孝復輯十二卷又輯先生子壽毛居士眉我詩集六卷刊於宜興版旋燬道光間壽陽張靜生收原刻未載者六卷謂之拾遺咸豐初年里人劉雪厓彙刊爲霜紅龕集四十卷我詩集十一卷名曰備存意在賅備有所得卽錄不復甄擇又附仙儒外紀十卷則集青主與郭還陽靜中二人之遺帙也

雪嵯又編 國初山右四家文鈔傅青主霜紅龕集三卷戴楓仲廷杖半可集四卷畢亮四振姬西北文集三卷陳文貞廷敬午亭文編一卷文皆選錄而文貞獨少蓋闡幽之意篤也

富平李天生因篤康熙中舉鴻博當時所稱天下四布衣之一也所著受祺堂詩集田少華大令刊之文集采入四庫全書而世無刊本道光丁亥楊松林孝廉浚因馮雲杏所藏本刊成四卷庚寅又以探獲者續刊四卷

顧亭林先生博極今古每往來道路載書滿車朝夕讀不輟其少時以春夏溫經請文學中聲音鴻鬯者四人設左右座置注疏本於前先生居中其前亦置經本使一人誦而已聽之遇有字句不同或偶忘者詳問而辨論之讀二十紙易一人四人周而復始計一日溫書二百紙十三經畢則溫三史或南北史故先生之學習熟而不遺纖悉如此

李光坡安溪相國介弟隱居不仕潛心經學著三禮述注爲詩有白沙定軒之勝 仁廟賜聯云道通月窟天根裏人在清泉

白石問

平湖高文恪康熙甲申放歸原籍暴卒生時家人夢楊士奇來因以名之兩人皆由布衣致通顯蓋非偶然

何義門焯以拔貢爲李文貞薦直南書房 賜舉人復賜進士改庶吉士康熙五十二年再以文貞薦 召赴闕授編修直武英殿五十四年有蜚語上聞 聖祖方自熱河還京命收繫并簿錄其舍中書付南書房學士蔣廷錫等視有無狂誕語檢五日無有間有譏笑士大夫著作詎近科文者粘簽以進而辭吳縣令餽金札稿亦厠焉 聖祖閱畢怒漸解且嘉其有守僅坐免官還其書 命仍直武英殿

萊州有文官果花嫣紅開時鮮麗繁密可愛實大二三寸許剖之中有子數枚再剖之得仁作螺旋形味甘淡而有微香如蓮

實越宿則苦矣康熙間 聖祖嘗問掌院揆敘曰聞湯右曾工詩有刻者令進呈揆對曰刻者未見適在臣寓有所作文官果詩命取閱 御製賜和有茸香葉密待詩公句後西厓侍郎刊懷清堂集以文官果詩冠於卷首志 恩遇也

杭堇浦先生應大科入詞館旣而罷歸生平勤於著書年七十餘讀書日以寸計所著若史漢疏證諸史然疑三國志補注金史補闕歷代藝文志詞科掌錄詞科餘話道古堂詩文集榕城詩話桂堂詩話各若干卷其餘零星考證成書者尙有數種腹笥淹博老而好學一時殆無其匹

齊次風侍郎淹貫羣籍尤諳地理聞西邊用兵時上下或有所問輒條其遠近險易以對驗之則出兩漢書志然同時讀兩漢志者不盡知也

顧祖禹字景范晚號宛溪生時父夢范祖禹故以爲名字隱居求志著讀史方輿紀要一百三十卷別爲輿圖要覽四卷指示天下形勢如指諸掌徐尙書乾學修一統志開局包山延主其事三聘乃往書成將列其名以上景范不可至於投死階石始已先是甯都魏禧遇景范見所著書以爲數千百年來所絕無僅有者

錢塘沈荅町名景梁字敬履家極貧而不妄取所居不蔽風雨縛蓋著屐枕蓆其中所傳秘書至數百冊喜元白廷玉詩求湛淵全集不可得掇拾叢殘積久編爲三卷今四庫全書所收卽此本也嗜酒苦不時得黃小松易歸自濟甯袖資以贈口占謝之云酒人歸訪故山棲怪我胡盧久不提笑贈青銅三百片晚來依舊醉如泥

婁縣姚春木椿字子壽號樗寮博聞強識十餘歲以詩鳴中年絕意仕進晚歲尤用意宋儒諸書有司將以孝廉方正薦辭不就性和而介不妄取與家甚貧不戚戚也所爲詩不下數千篇今所刊通藝閣詩僅八卷文集六卷先爲莊舍人仲方集費用活字板成之其後楊象濟沈南一以其自定稿訂爲十二卷名晚學齋文集其所輯 國朝文錄張公祥河刻於陝西 國朝學案一書已創稿兵燹之後不可復問

錢塘張仲雅雲璈著選學膠言二十卷選藻八卷四寸學六卷垂綏錄十卷異字同音義若干卷已刻者簡松草堂詩集二十卷蠟味小稿五卷歸艸一卷知還草四卷復丁老人草二卷金牛湖漁唱一卷三影閣筆語四卷而文集十二卷則未刻仲雅爲侍郎映辰子大學士梁公詩正甥大學士嵇公璜壻凡春

閣輒以三公典試迴避晚乃以他途爲湖南知縣解綬歸年七十餘矣猶步登吳山或至湖上與諸文士賦詩談笑無異少壯汪氏東軒吟社推爲祭酒

莊芝階舍人仲方毘陵世族僑居秀州繼復遷杭性慷慨好言論嘗以宋呂成公所輯聖宋文鑑盡于北宋未及南宋乃爲南宋文範一書閱二十餘年而始成今仲方歿十餘年而杭州兩爲賊陷此書遂不可得

汪小米中翰嘉慶丙子舉人累世清門藏書富有性淡雅劬於著述而尤篤貧交里人爭賢之嘗結吟社凡十年得一百集擇存所爲酬唱詩若干首爲清尊集又屬費曉樓丹旭貌社中人仿西園雅集之意爲東軒吟社圖余亦廁焉今相去三十餘年復更喪亂社中人十九宿草矣旣慟人琴又悲桑海前塵如夢



能無愴然

鄭板橋變工畫蘭竹字亦有別趣嘗爲濰縣令濰有木工某能效其書畫佳者幾亂真今人家所藏贗者十九

呈貢戴古村涓工爲詩文劉寄庵大紳爲五華書院山長刊滇南五子詩古村其一也蔣礪堂吳巢松諸公皆賞其才余親家陳午橋鴻督滇學選爲拔貢生秋試屢蹶益淡於仕進懸壺市中一以吟嘯自適所爲晚翠軒詩極清整有法度初稿續稿三稿四稿五稿共四十卷余在滇時嘗以五律二首贈之

桐城姚石甫瑩工於文詞吏事亦精敏道光間擢臺灣道入見宣宗言爾文字甚佳何當時不入翰林對以臣不能書 命進冊子 上覽良久云爾書太劣石甫遂鐫一小印曰天子知臣不善書

桐鄉嚴繼生辰倜儻工詩性喜乘馬嘗言人世策騎之榮莫如  
大將軍奏凱還朝三鼎甲臚傳歸第戲製象鞭二一題王右丞  
句玉靶角弓珠勒馬漢家將賜霍嫖姚一題蘇長公句云一色  
杏花紅十里新郎君去馬如飛并作七律一章記其事繼生久  
困公車已未成進士入詞垣改官秋曹有倦游齋詩若干卷  
楊謙江都籍回回人康熙乙酉丙戌武科解狀兩元累官石匣  
副將進方物至行在 命之射連中四矢 上喜曰不負欽定  
狀元嘗以 御製山莊晚眺詩賜之弟凱亦武進士能詩改纂  
修武英殿雍正後仍晉武階官至湖廣提督

魏經國正白旗人少時供役大內善啖常苦食不足請於管工  
大人願夜以繼日米亦倍支一日夜漏下 聖祖偶出禁中聞  
力作聲問知其故因 命以米數升作飯賜食經國跪食盡之

知爲異材擢用守備累官江南提督

馬公全陽曲人初名琰字具堂始隸兵籍乾隆壬申一甲第三人及第授二等侍衛出爲福建游擊以事被劾更名全至京師入伍巡捕營復以兵應武試己卯庚辰再捷高宗御紫光閣校試識公曰爾馬琰耶公叩首引罪而技故絕人高宗大悅賜一甲第一人一身再及第者古所未有真奇遇也公累官至江南提督討金川時爲領隊大臣戰於昔嶺死之

唐侃旗人嘗隨大將軍費揚古征昭木多雍正間以副都統銜予告家於西山之下精於琴理在軍以琴自隨高宗幸香山過其廬嘗使之彈大有松石間意

黃標字殿豪南澳人籍香山由行伍累官至虎門左翼總兵善射又善占雲氣測風雨凡東南海道淺深險易如指諸掌每戰

必親操柁所向有功嘉慶五年以軍事方殷未能入覲特 命  
繪像以進

嘉慶間壯烈伯李忠毅長庚治海盜最有聲所擊滅攻散如水  
澳鳳尾補網賣油七都等幫不下千艘終歲在海不歸卽歸亦  
在鎮海修船備糧不至家也嘗封所落齒寄其夫人示以身許  
國恐無歸櫬之意後擊蔡牽於粵洋喉間中礮而薨先是禱於  
甯波關帝廟占籤詩云到頭不利吾家事留得聲名萬古傳故  
文達哭公詩云麥城久合關家讖彷彿英風滿廟旗

張永祥淮甯人槍法精絕人呼爲張鐵槍嘉慶丁巳二月白蓮  
賊齊王氏卽所謂齊二寡婦者自楚掠豫將南趨襄城永祥以  
鄉兵三百人敗之於盧氏賊遂竄秦蜀當事給永祥把總銜意  
不屑也後十年阮相國元撫河南召永祥給役麾下撫浙時復

攜與俱使教溫甯營槍法相國去浙而屠孟昭倬方知儀徵縣事聘之往捕巨梟蔣光斗等聞永祥甚馴謹而臨事慷慨無所撓阻有古烈丈夫風乃混跡騶鈴不能以功名顯惜哉

任昭才鄞人入海底能數時之久行數十里之遠阮文達元撫浙獲安南二千餘斤銅礮遭颶沈溫州三盤海底命昭才往圖之昭才用八船分二番一番四船空其中四船滿載碎石自引八巨繩入海底繫沈船之四隅以四繩末繫四石船繫定掇其石入四空船則石船空矣浮起者數尺復以四繩繫二番之石船繫定復掇石入第一番空船浮起者又數尺如此數十番船與礮皆出水面此蓋祖秤象之意而變通之者昭才入營得微官以病卒

乾隆戊子新疆昌邑屯官中秋夜醵諸流人男女雜坐屯官醉

逼諸流婦唱歌頃刻激變殺屯官劫庫據城明日烏魯木齊聞  
警都統溫公福率城中存兵一百四十七人往至洪山口守備  
劉德叩馬曰此去昌吉九十里疾馳至城下彼逸我勞且仰攻  
百餘人胡足恃前行無險可扼不如扼此山口一綫路以待其  
來賊易破也賊至德手紅旗令於眾曰望賊塵不過千人然皆  
亡命必死關幸所乘皆屯馬未經戰陣受創必反走爾等但屈  
一膝伏而擊馬馬驚逸賊卽潰又令曰望影鳴鎗則不及賊且  
藥易盡當視我旗動乃鳴槍違者吾手刃之俄而賊鎗齊發聲  
震山谷德仍令伏不動有前隊一人傷德曰彼鎗及我我鎗亦  
及彼矣旗一揮鎗盡發賊馬驚逸譟而乘之遂殲焉溫公歎曰  
劉德貌如村翁乃臨陣能如是大官但善應對耳

羅斯舉字天鵬四川東鄉人伉直樸實勦三省教匪時以健鬪

聞當時推爲名將累官至雲南提督予見於大理時年六十餘矣登陟險峻矍鑠無異壯盛嘗構屋於蒼山龍眼洞置酒召客飲飲次言少年爲劇賊無賴事不稍諱洵偉人也洞後對峙一峰相去約三丈鑄鐵爲板寬約一尺橫置兩峰之腰以通往來羅導客先往眾客色沮不敢前余獨從其後羅笑曰君誠有膽沃以一巨觥今衰老回思前事心轉悸矣

啞孝子昆明人乾隆間居東門外貧且啞不能治生奉母室中已出丐食有得則歸以奉母暑日或與以瓜受而不食強之不可瞰之則再拜奉膝下矣母亡眾議給棺不受至一井畔汲之得錢六千蓋所積以供葬費者後不知所往踰數十年有見之迤西者相傳爲仙去余謂孝子得仙固宜然事涉恍惚若其人則真孝矣惜乎姓氏之不傳也

乾隆間內府人馬寅著字協恭其父歿於遼左年十五告其母請歸父骨母曰兒不知家貧耶曰數年來母給兒果餌錢兒盡積之不足殆無幾母憐其幼難之固請不已乃典衣飾與之以一僕一馬往中途僕死未幾馬亦死協恭卒負骨千里徒步以歸後嘗爲杭州織造

興於詩不知何處人父子同客曹縣嘉慶癸酉林清倡亂逆黨之在山東者應之九月初八日賊入縣署子先逸求父復入遇賊併斫之十一日子忽蘇父僵不能起恍忽間有神人爲合其頭骨卒不死此殆有陰德歟大興舒鐵雲位作興更生篇紀其事

吳中杜士元性嗜酒能於核桃上雕東坡游赤壁事人物纖悉畢備號爲鬼工乾隆間召入內賜金帛甚厚士元狂逸之士



不樂居禁垣嘗伐竹爲洞簫踞松頂吹之守者以狀聞 高宗  
曰此人顛矣遂放歸吳而嗜酒佯狂如故

木園和尚字蛤庵別號湘溪道人順治間隨其師報恩入侍萬  
善殿問答輒當 聖意時報恩侍者多楚人師年最少 世祖  
以小湖廣呼之康熙間復入京 召見於玉泉山行在 賜飯  
徹所薦含桃食之後患脾疾 勅御醫劉元辨診視 賜參藥  
積食

康熙己卯 南巡駐蹕金山之江天寺住持僧超樂奏對稱  
旨因進磬山天隱語錄若干卷言磬山僧圓修爲臨濟三十一  
世孫乃天童圓悟之同法弟大覺普濟傳法之師天童語錄蒙  
世祖勅賜入藏圓修語錄未經續入臣僧不勝拳拳越日傳  
旨准入藏超樂率眾僧合掌稽首而退扈從諸臣如張文貞

高江村皆親見其事圓修宜興閔氏子大覺普濟禪師名玉林  
嘗應世祖欽召者也

養吉齋餘錄卷九終

養吉齋餘錄卷之十

賜進士出身雲貴總督翰林院編修

臣

吳振棫纂

南海梁藥亭佩蘭中順治丁酉解元絕意仕進三十餘年矣京師一巨公有舊同學招之入都令試禮部是歲巨公適典試梁成進士以門生禮謁巨公徘徊再三曰吾輩老兄弟奈何旣而曰否者當先拜故人遂彼此爲四拜禮若斷前好者拜已受梁拜如師生儀邵陽康乃心謂拜恩私室而廢朋友之大倫非禮也作座師門生辨

吾浙海昌陳氏仕宦稱最盛康熙以來有三閩老九尙書之謬其先齊高俟後也宋修撰世英由汴入浙數傳至諒遷海甯諒生榮始蒙母姓以陳爲氏世稱高陳至今兩姓不通婚姻也郡名書渤海不書潁川

益都馮相國鄉舉時報至方熟睡家人呼之不醒以水噴面亦不醒舉家大驚而先生方夢登太山擁雲氣蓬勃而上回視十八盤天門厯厯在目至則張席殿中懸錦繡於門眾樂雜作鼎脯漿醴咸備若有神人揖讓酬酢成禮將退聞雞鳴海中日出如車輪遂遽然寤寤時鼻息猶有酒氣

錢稼軒維城年少有才客京師爲尙書公訥親所賞遂相結納乾隆乙丑殿試訥方貴幸非科目出身而命讀卷稼軒遂得大魁榜眼莊公存與則稼軒內兄也兩家比屋而居毘陵人皆嘖嘖歎羨

乾隆甲戌散館繙譯題爲陶潛桃花源詩是日駕出步自西階向東行至翁方綱前取其卷閱之因問姓名諭曰牙拉賽音漢語甚好也次日御定一名

張文端癸丑分房得海鹽張英字仲張官部郎投刺謁師名加  
玉旁以別之馬鳴鑾崑山人癸丑進士丙辰分房得山西馬鳴  
鑾二事正相類

吳縣潘榕皋弈雋乾隆己丑進士殿試卷擬第八以引見遲誤  
降附三甲末授中書嘗入直劉文正指以語人曰此天子呼來  
不上船者癸丑猶子文恭以殿撰乞假完姻汪晚雲爲寫秋帆  
歸興圖榕皋題云天子呼來不上船元臣諸語一時傳錦標奪  
得全家喜棖觸前塵廿五年後榕皋重宴瓊林文恭已兼署禮  
尙謝摺有云臣伯父重登蕊榜百五人之選尙有一存我 聖  
朝重宴瓊林二百年以來於斯六見海內傳誦以爲盛事  
乾隆乙酉正月翰林院公宴時補亭先生觀保掌院事定圃先  
生德保爲大教習兄弟同列首席一時以爲佳話

潤祥字補臣乾隆間官祭酒其高祖鄂拜叔曾祖鄂爾奇叔祖鄂容安皆嘗居是官遂有四世司成詩卷題者甚夥

乾隆間兵尙金公士松年甫五十七卽與乙巳千叟宴官階方二品而賞賚同一品皆異數

嘉慶甲子劉石菴王惺園朱石君三相國徐樹峯宗丞紀曉嵐宗伯訂於次年正月作五老會時劉年當八十六紀八十二王八十一徐八十朱七十五共四百四歲迨季冬二十四日劉相無病而逝乙丑正月六日會於知足齋以德潤齋瑛冢宰代之德是年七十八越四日惺園相國亦逝

陝撫聽事東偏有四來堂爲陳文恭所名蓋文恭四撫關右也堂額久失今額爲楊致堂以增補書

道光壬午正月吳中大雪時石廉訪韞玉方里居而潘文恭世

恩吳學士信中亦侍養在籍吳廉訪廷琛以浙江觀察入都皆吳人皆殿撰也石招飲於鶴壽山房潘興石各首成七律二首更唱迭和黃蕘圃丕烈策刻成卷曰四元唱和詩

閩縣林春溥嘉慶壬戌翰林同治壬戌重赴瓊林兄容嘉慶辛酉舉人道光乙未成進士年七十矣爲倭艮峯相國本房所取士相國以壬戌生尙在林鄉舉後一年

寶坻李比部光庭侍郎菡之叔也長子藻以嘉慶戊午生咸豐戊午又得一子年已八十餘伯兄季弟之生相去正一甲子程春海侍郎恩澤直內廷久一日與祁尙書寓藻同召見宣宗諭侍郎云汝父蘭翹先生品學朕昔年甚敬之汝之聲名亦好宜守素行祁出以語人同朝榮之蘭翹名昌期乾隆庚子探花官至講學蓋嘗直上書房也

張永清濟南人五歲能背誦 高宗樂善堂全集乾隆戊辰  
東巡其祖貢生張廷望挈之迎駕 命入行營 聖母 中宮  
皆加賞賚

道光乙酉襄平蔣協揆攸銛於敗麓中檢得卷面餘字號浮籤  
一紙蓋乾隆戊戌應童試時物也是歲襄平入泮年十二至是  
五十年矣明年典會試童時坐號宛然在目因取學中原案牘  
蒙漢各生姓名旗籍裝爲冊而揭此籤於前一時歌詠成帙傳  
爲佳話詩有用圓毡者名臣奏疏司馬光論圓毡兩號所對策  
辭理俱高是宋時取士編號之字又劉昌世蘆浦筆記載所編  
字號尙有鞞鰲觥觥五字

廣東一百三歲老人陸雲從應道光丙戌會試 賜國子監司  
業銜張溫和祥河以詩紀之首聯云四朝天下老萬里地行仙



大臣之妻例無恩卹雍正二年大學士富甯安夫人卒 世宗以富甯安在軍前効力年久派內大臣一員侍衛十員往奠茶酒賜銀五千兩令大學士嵩祝侍郎常壽監辦葬事出殯日令本旗文武官往送 恩禮爲向所未有

宋有神弩弓亦曰克敵弓立於地而踏其機可三百步外貫鐵甲元滅宋得其式曾用以取勝至明乃失傳永樂大典載其圖說紀文達與鄒念喬侍郎就圖說審諦逗合迄不能成欲俾西洋人作之劉文正曰西洋人意至深巧此物旣爲利器安知不陰圖以去而以不解謝我乎永樂大典尙存他日或有解者何必求之異域文達深服其言而止

鳳陽畫鳳靈璧畫判官業此者凡數十家言每歲所畫千萬鳳中必有一仙鳳靈璧判官則訛璧爲辟謂其神甚靈辟不祥也

世俗信其說且必鈐以縣印以徵非僞可爲捧腹然小民賴以衣食此等謬論正不當道破

禹貢載泗濱浮磬靈璧地近泗前史每載采石作磬事 本朝乾隆年間亦嘗繪圖定式采取佳石以備宮懸今市中有琢磬以鬻者色如礬皆凡石耳聲不能清越以長也

宋紹興間山陰人杜季陽綰雲林石譜所載靈璧石巖竇嵌空極奇巧者則未之見

大理點蒼山華陽國志作熊倉山產奇石白質黑章間雜青綠以蠟沃之而山川烟雲之狀益顯狀人物者不恒見或出匠氏雕摩之工非本質也明正德間鎮守中官遣軍匠攻鑿山崩壓死無算巡撫歐陽重疏罷之見重傳乾清坤甯二宮告成需石陳設滇中以石四十積分製佳名以進內有山水人物屏石八

塊曰山川出雲煙波春曉白雪春融雲龍出海槎泛斗牛春雲  
出谷海晏河清振衣千仞又二十八塊亦各繫以四字詳載泉  
南雜志按 純廟瀛臺大理石屏歌結句云廉而不劓柔豈屈  
巍然猶是前朝物幾經海水復桑田依舊春風更秋月是明時  
宮中大理石屏甚多正不止此四十櫝也阮相國元督滇所得  
佳石甚多署內建選石亭今其地已爲豺虎窟穴此石安可得  
哉

唐宋端石非今之水巖宣德以前所取亦非今水巖惟萬厯二  
十八年石刻在今水巖上蓋萬厯間所用故明季陳喬生硯書  
言水巖開於近日數十年始知重之云云明時設官守坑至  
本朝順治丁亥始罷其禁近嘉應吳蘭修博考諸家之說作端  
溪硯史言自順治丁亥至道光癸巳先後開坑十有四次

宋太宗淳化二年罷端州貢硯而元豐時王存等撰九域志仍載入土貢宋史亦載治平中貢硯事殆甫罷而復徵也前明中使采硯官民苦之設守坑官一員有私取者以竊盜論我朝悉除去之惟每歲端午督撫以硯九方隨葵扇葛布進之購自民間製爲官式縣官石戶均無科累

康熙丁酉揚州盧映之市上購一硯上有宋宣和內府製六字似澄泥而輕入水不沉久乃知爲漆沙所成因仿製焉金冬心先生嘗爲製銘今揚州市此硯甚眾映之遺法也

湯鵬字天池蕪湖人善銘鐵爲畫梁山舟先生爲作歌和者甚眾初湯貧甚技亦不奇有道士乞火於爐爐成詰之曰月餘未鍛也道士擊其竈曰今可矣徑去後覺心手有異隨物賦形無不如意蕪湖水出宣歙體重流駛於淬鋼宜業者甚眾然必取

水於石橋港蓋東則溪流方緩西則江潮漸殺也近日尙有鐵畫值亦昂然遠不逮湯之工

宋慶厯中布衣畢昇創爲膠泥活字版法乾隆間刊四庫全書如法鑄銅爲字凡若干依文排比無不可印之書亦名活字版後改名聚珍版排比印造之法詳載侍郎金公簡所撰武英殿聚珍版程式一卷後有請燬銅以助京局鼓鑄者所增益無多而版遂廢剗之工日有耗費而蠹敗已甚始知燬銅字爲可惜也

康熙三十八年 南巡至蘇州屬之東山前工部主事席啟寓進蘭花二缸及百家唐詩吳廷顯紀其事又鄒宏志種太湖蓴四缸作貢蓴詩二十首及家藏采蓴圖進之 命送蓴暢春苑宏志書館行走後敘勞得山右一令人目爲蓴官詳見金友理

太湖備考按太湖向無采蓴者天啟壬戌秋武山鄒舜五與陳眉公始采而食之張度宏爲作圖查初白集有次眉公韻題圖七古一首宏志所進卽此圖也

北方之菰以安肅產者爲最美史文靖貽直性好潔謂其得糞而肥屏之不食 高宗御製嘗及之

蕭山湯文端金釧居官以清正名在澄懷園以水荳花根爲杖名游龍杖一時題詠甚夥

大同廣靈山中產天冰如石而脆層層剝之瑩徹如玻璃水晶居人用以映窗洞見內外

武鄉淨業寺有倒栽槐大可合圍高不盈丈其本上豐而下殺狀甚奇詭數百年物也

坡詩有詩入務語後閱林霽山白石樵唱亦用詩入務注云舊

時自三月初一入務至十月初一開務謂農務方殷州縣不受  
婚產詞訟也

宋寇瑊少孤鞠於祖母王登朝以妻所得封邑回授朝臣得回  
封卽今地封

南宋朱翌轎中坐睡詩飽食登長道篴輿枕臂眠鼻間真栩栩  
腹外亦便便徙倚兩竿竹哈噓四僕肩偶然成小憩放手卽醒  
然此卽今竹塹四人轎也

王伯厚漢制考引周禮麋鹿魚爲菹注云今益州有鹿殘者近  
由比爲之矣殘於委切疏益州人將鹿肉畜之殘爛謂之鹿殘王漁

洋古夫于亭雜錄因引爲鹿尾之證

江南餘載云烈祖年甫三十服白髮藥一夕皓然事在寇萊公  
前今有烏鬚藥未聞有白髮藥

養言齋集金卷一  
耳衣詩中多用之清波雜誌有眼衣用紗障塵也二字未見有  
用者